

Кафаннинг сифати ва миқдори | Фикҳ дарслари (269-дарс)



19:00 / 16 февраль 1830

Ҳанафий мазҳаби бўйича, кафан уч турга: зарурат кафани, кифоя кафани ва суннат кафанига бўлинади.

1. Зарурат кафани.

Зарурат ва ожизлик бўлганда эркак ва аёлга имкони бор кафан қилинади. Бунда энг ози баданни тўсадиган нарса бўлиши лозим.

2. Кифоя кафани.

Бунда банд ҳаёт вақтида киядиган энг оз кийими миқдори кафан бўлади.

Эркак киши учун изор (шалвор) ва лифофа (бошдан оёқларнинг учигача ўраладиган мато). Аёл киши учун изор (лозим), лифофа ва рўмол.

3. Суннат кафани.

Бу кафанларнинг энг мукаммалдир. Эркак учун уч нарса: изор (шалвор), қамийс (кўйлак) ва лифофадан, аёл киши учун беш нарса: изор, қамийс (кўйлак), химор (рўмол), сийнабанд ва лифофадан иборатдир.

Ҳанафийлар наздида майитга салла макруҳдир. Кейинги авлод уламолари: «Олимлар ва ашрофлар учун салла яхши», деганлар.

Эркакнинг кафанини ипак ва бўялган нарсалардан қилиш макруҳдир.

Аввал лифофа, кейин изор ёзилиб, сўнгра қамийс кийгизилади. Эркак киши шу кафанликларга ўралади. Аввал изорнинг чап тарафи маййитнинг устига, чап тарафига тортилади. Кейин ўнг тарафи. Охири лифофа ҳам шундай ўралади.

Аёл кишини кафанлашда аввал лифофа ва изор ёзилади. Маййитани изорнинг устига ўтирғизиб, қамийс кийдирилади. Сўнг изор билан ўралади. Сочини иккита қилиб ўриб, қамис устидан кўкрагига ташлаб қўйилади. Сўнгра бошига рўмол ўратилади. Кўксини сийнабанд билан боғланади. Охири лифофа билан ўралади.

Кафанларнинг устидан маййитнинг бош ва оёқ томонидан латта билан боғлаб қўйилади.

Ўликка жаноза намози ўқиш фарзи кифоядир. Жаноза намози такбир айтиб, сано ўқиш, яна такбир айтиб, Набий соллаллоҳу алайҳи васалламга салавот айтиш, яна такбир айтиб, дуо ўқиш, сўнгра такбир айтиб, салом беришдан иборатдир.

Биринчи такбирдан бошқада қўлни кўтармайди. Имом маййитнинг кўкрак баробарида туради.

Учинчи фарз – маййитга намоз ўқиш.

«Кифоя» китобининг биринчи жузи асосида тайёрланди

Ушбу китоб Ўзбекистон Республикаси Дин ишлари бўйича қўмитанинг 2022 йил 5 октябрдаги 03-07/7013-рақамли хулосаси асосида чоп этилган.